

**Nakorsat namminersortutut nunatsinni aallartitsisinnaangornissaat anguniarlugu
Naalakkersuisut inatsisiliornissamik peqquneqarnissaannik Inatsisartut
aalajangiiffigisassaattut siunnersuut**
Inatsisartunut ilaasortamit Doris Jakobsen Jensenimit saqqummiunneqartoq

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerpeqarnissaanut

ISUMALIUUTISSIISUTAA

Ataatsimiititaliap suliarinninnermini uku ilaasortarai:

Inatsisartunut ilaasortaq Mala Høy Kúko, Siumut, siulittaasoq
Inatsisartunut ilaasortaq Anna Wangenheim, Demokraatit, siulittaasup tullia
Inatsisartunut ilaasortaq Doris J. Jensen, Siumut
Inatsisartunut ilaasortaq Dines Mikaelson, Siumut
Inatsisartunut ilaasortaq Mikivsuk Thomassen, Inuit Ataqatigiit
Inatsisartunut ilaasortaq Edvard Nielsen Aronsen, Inuit Ataqatigiit, sinniisussaq
Inatsisartunut ilaasortaq Mette Arqe-Hammeken, Naleraq

UPA2024-imi 24. april siullermeerinninnerup kingorna siunnersuut ataatsimiititaliap misissorpaa.

Siunnersuutip imarisaa siunertaalu

Inatsimmik nakorsat namminersortutut aallartitsinissamik kissaateqartut inatsisitigut tunngavissaqalernissaannut periarfissiisumik Naalakkersuisut suliaqarnissaat siunnersuuteqartup aalajangiiffigisassatut siunnersuummi matumani kissaatigaa. Pingaartumik innuttaasut journaliinut attuumassutillit, aaviisarnermut tunngasut, tarrarsuisarnermut tunngasut, nakorsaatitut tunngasut il.il. pillugit peqqinnissaqarfimmik suleqateqarnissamut isumaqatigiissutit amigaataanerat nakorsat namminersortutut ingerlatsilernissaannut ajornakusoortitsisoq siunnersuummut tunngavilersuutini allassimavoq.

Siunnersuutip Inatsisartunit siullermeerneqarnera

Siunnersuut tapersorsorluarneqarpoq ilaatigullu innuttaasut peqqinnissamut tunngatillugu sullinneqarsinnaalernissaasa qulakkeerneqarnissaanut nakorsallu Kalaallit Nunaannut soqutiginnilernissaannut periarfissat tamarmik pisariaqartinneqarnerat ajornartorsiutillu nakorsanut namminersortuusunut kisimi tunnganani peqqinnissaqarfimmili sulialinnut tamanut attuumassuteqarnera pillugu oqallilluartoqarneranik kinguneqarpoq.

Peqqinnissakkut sullississutinik pilersitsinissaq ingerlatsinissarluk periarfissaareersut, taamaattumillu inatsisitigut tunngavigisassat amigaataangitsut Naalakkersuisut akissuteqaamminni oqaatigaat. Nakorsatut sulineq pillugu inatsisip Kalaallit Nunaanni atortuulersinnissaa pillugu peqqussut kiisalu nakorsaatinik nunatsinnut eqqussinissamut akuersissummik piniarnissamut periarfissaqarnera Naalakkersuisut innersuussutigaa. Naalakkersuisut siullermeerinninnermi allannguutissatut siunnersuut imaattoq saqqummiuppaat:

“Nakorsatut namminersortutut ingerlatsineq annertunerusumik taperserniarlugu siammarterniarlugulu periarfissat paasiniarlugit kingusinnerpaamik UPA2025-mi tunniunneqartussamik qulaajaanermik Naalakkersuisut peqquneqarnissaannik Inatsisartut aalajangiiffissaattut siunnersuut. Qulaajaaneq pisortat peqqinnissaqarfiat nakorsallu namminersortutut ingerlataqartut akornanni suleqatigiiffiusinnaasunik aningaasaqarnikkut allaffissornikkullu tunngavissat pillugit naalakkersuinikkut isummernissamut tunngavissiissaaq.”

Inuit Ataqatigiit allannguutissatut siunnersuutaat Naalakkersuisuniit siunnersuutip assinganik oqaasertaqarpoq, kisianni ukiaanerani ataatsimiinnissamut 2024 piffissaliussartaqarluni.

Demokraatit aamma allannguutissatut siunnersuut ima oqaasertalik saqqummiuppaat:

“Peqqissaanermik suliaqartut, kalaallit nunaanni sulinissamut pisinnaatitsissummik peqartut, Kalaallit Nunaanni namminersortunngornissaannik periarfissinneqarnissaannut Naalakkersuisut nalunaarummik sananissaannik Inatsisartunit peqquneqarnerat. Nalunaarut kingusinnerpaamik UKA2024-ip naanerani suliarineqareersimassaaq”.

Tamanna tunngavigalugu immikkoortoq ataatsimiititaliamut suliarineqartussanngorlugu innersuunneqarpoq.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffisassatut siunnersuutip piviusunngortinneqarnissaanut aningaasaqarnikkut allaffissornikkullu kingunerisassat siunnersuummi tunngavilersuutitut allaaserineqassat.

Taamanna naapertorlugu siunnersuutip piviusunngortinneqarnerani aningaasatigut kingunerisassat siunnersuummi oqaatigineqartut ataatsimiititaliamit maluginiarneqarpoq, taamaalilluni siunnersuutip piviusunngortinneqarnerani AC-fuldmægtigip ukiup affaanit ukiup ataatsip iluani sulinera 250.000 kr.-init 500.000 kr.-inut naapertuuttoq pisariaqartinneqassasq naatsorsuutigineqarpoq.

Apeqquteqaatit

Ataatsimiititaliap siunnersuummik suliaqarnerminut atugassaminik apeqqutit arlallit akineqarnissaat pillugu Peqqissutsimut Naalakkersuisoq qinnuigaa. Ataatsimiititaliap apeqquteqaatai akissuteqaatillu assilineri isumaliutisissuummut matumunnga **ilannugsaq 1-itut** kakkiunneqarput.

Ataatsimiititaliap siunnersuummik suliarinninnera

Ataatsimiititaliap oqallinneq aamma sulisunik amigaateqarneq Kalaallit Nunaannilu innuttaasunut uninngasunullu tamanut kinguneri pillugit soqtigininneq annertoq maluginiarpai. Siunnersuuteqartup siunnersuummik saqqummiussinerminut tunngavilersuutaata, tassungalu ilannugullugu inatsisitigut tunngavigisassat amigaataanerisa aammalu suut periarfissaareersutut Naalakkersuisunit isigineqartut akornanni assigiinngissuteqartoqartoq ataatsimiititaliap eqikkaalluni oqaatigissavaa.

Ataatsimiititaliap paasinninnera naapertorlugu peqqinnissaqarfiup namminersortutullu peqqinnissakkut suliallit akornanni suleqatigiittoqarsinnaaneranut aningaasatigut allaffissornikkullu sinaakkutissat pillugit naalakkersuinikkut aalajangiinissamut tunngavigineqarsinnaasumik nassuiaasiortoqarnissaa Naalakkersuisut allannguutissatut siunnersuutaanni siunniunneqarpoq. Maannakkut peqqinnissaqarfik peqqinnissaqarfimmik pisortanit aningaasalersorneqartumik annertuumik toqqammaveqartoq aammalu sumi najugaqarneq apeqqutaatinnagu naligiimmik periarfissaqartoqarnissaa suliniutigineqartoq ataatsimiititaliamit ilisimaneqarpoq. Namminersortutut peqqinnissakkut suliallit annertunerusumik atorneqartarnissaat pillugu aalajangiisoqassappat innuttaasut aamma uninngasut ajornaannerusumik peqqinnissakkut sullissinerit pisariinnerusumik atorsinnaalissagaat ataatsimiititaliamit ilisimaneqarpoq. Tamatuma peqatigisaanik peqqinnissakkut sullissinerit atorneqarsinnaanerit eqqarsaatigalugu inuit akornanni naligiinngittoqalersinnaanera nalinginnaasumik ilisimaneqarpoq, tassa innuttaasut/napparsimasut akissaqarluarnerusut sullissinernik taakkuninnga atuinissamut akiliisinnaassuseqarnerummata¹.

Ataatsimiititaliap inassuteqaatai

- Ataatsimiititaliami amerlanerussuteqartut Inuit Ataqtiginneersut, Siumumeersut Demokraatineersullu Demokraatit allannguutissatut siunnersuutaat

¹ [Social ulighed i mødet med sundhedsvæsenet \(sst.dk\)](#)

akuerineqarnissaa inassutigaat

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa

Mala Høy Kúko
Siulittaasoq

Anna Wangenheim
Siulittaasup tullia

Doris J. Jensen



Dines Mikaelen

Mikivsuk Thomassen

Edvard Nielsen Aronsen

Mette Arqe-Hammeken